

## **Wosheetso P'awlos Wosho Rom Ashuwots Maants Kindo**

Wosh na'o P'awlos wosho Rom ashuwots maants guút'etso P'awlos Romitse fa'a Ik' moo s'ilosh bí'ettsetse k'ande'er bín bo kotetwok'o woshosha. P'awlos Romitse fa'a amantsuwotston muk' aawosh b finiyakon bin bo te'úwe Spen maants amosha b tesh, Krstiyani imneti jangosh P'awlos t'iwints bdek'tsonat krstiyaniwots bo beewotse finats bo jitsitu krstaniwoti danuwots jango ik ikon beezt guut're, P'awlos woshts wosho s'eenon bdatseyir woshanitsne.

P'awlos Romitse fa'a amantsuwotssh b jamo b t'intsiyakon boosh Ik'o b k'onitwok'onowere b jangiyihakoon b woshman dettso (1:17) «Ik'oke daatsets kááwu woto amanona, amanosha wotiyalo dooshishiyon be'ere» etiru aap'o bwottsok'owo kitsirwe.

Haniyere okoon P'awlos asaabiyan gawintsdek'tni b guut', ayhudiwotsi wotowa Ik' ash woterawwotsi ash jamwots morrosh keewek bowottsetse Ik'onton maneyo boosh geyife, ashuwots Ik'onton manewosh bofalitwere Iyesus Kerstosn amanaarniye, Ik'onton bo need'iyit ik wot handraan bdowetwonwere handr be bwottsok'o P'awlos gawintsdek'tni bkitsiri. Amantso Ik'oke jeeno detsetwe, Ik'i shayiro morronat k'iri angatse nas'o keshetuwe, K'ot. 5 tuut 8 P'awlos Ik'i nemonat amantsuwots beyotse finit Ik'i shayiri ango eeg k'alosh bwottsok'o kitsiruwe, Manats

dabt P'awlos «Ik'o ash naarosh b́ gedtsotse ayhudiwotsnat Ik'i ash woterawwots aawuk'oneya ik woto bofaliti?» ett aatetsmansh aanidek'osho etiruwe.

Ando aaniyi P'awlos b́kbitsok'on ayhudiwots Iyesusi dek'o bo k'azonwere Ik'o b́ beezke, manbwotwere Iyesus Krstos weeron Ik'o b́ kits kashet deero ash naar jamo b́daatsituwo woshoshe. Wotowa eree ayhudiwots Iyesusi bodek'et dúro b́weetuwok'owo P'awlos amanefe, b́s'uwatsnowere P'awlos krstiyani beyo awuk'o beyo b́geyituwok'o, bitsnor amantsuwots boat-satseyosh bodetsts gonkewon shuni weerats sha'o boosh b́geyituwok'oniye b́ iziri, Ik'osh fini jango, krstiyaniwots bodaatsi jangonat bo atsatsayosh bodetsts jishi keewi jangona, ash asaabiyon tuutson aatet keewwotsnowere ik ikon b́ iziri.

### **Jamon mas'aafan b́detstso**

Mas'afanitse ááwu wotts asaabiyots kindo 1:1-17

Kasho ash na'osh geyik b́wottsok'o 1:18—3:20

Ik'o b́kashiyi weero 3:21—4:25

Krstosn daatset handr beyo 5:1—8:39

Ik'o Isra'elsh b́detstso 9:1—11:36

Krstiyaniwotssh fin geyit fino 12:1—15:13

S'uwaatsi jamo 15:14—16:27

<sup>1</sup> Iyesus Krstossh guuts wottso woshosh s'egetsoke, Ik'i doo shishiyo daniyosh marat'etso P'awlosoke wosheets wosho.

<sup>2</sup> Doo shishiyawere Ik'o nebiyiwots weeron S'ayn mas'aafotse shin shin jangiyets aap'oniye.

<sup>3</sup> Doo shishiyonuwere Ik'i na'o b́ naaron Dawit

naarotse bshuweetsok'o kitsitkee, <sup>4</sup> Mank'owere no doonz Iyesus Krstos b S'ayin shayiron k'iroitse btuwon Ik' na'a bwottsok'o biangi eenon bdaneyi. <sup>5</sup> Krstos shúúts jangosh Ik' ash Woteraw jamwots bo amanituwok'onat boaletwok'o woshosh b weeron wosh na'o wotosh noon betsit s'aato dek'rone. <sup>6</sup> Itwoor Iyesus Krstosk itwotituwok'o Ik'o b s'eegts jirwots taalots itne.

<sup>7</sup> Eshe Romitse beyiru, Ik'o iti b shuntswotsnat bjiro it wotituwok'o itn s'eegts jamwotso!

Noo nih Ik'oknat nodoonz Iyesus Krstos s'aatonat jeenon itsh wotowe.

*P'awlo Roomi ams'iilo bgeetsok'o*

<sup>8</sup> It imneti shúútso dats jamats bshishetsotse, jamoniyere shinon Iyesus Krstos weeron it únets jangosh Izar Izeweri údituwe. <sup>9</sup> Jam aawo Ik'o tk'onor itn t gawiruwok'o b naay jangosh keewiruwu doo shishiyo daniyosh t nib s'eenon bish t finiruwu Ik'o taash tgaawoniye. <sup>10</sup> Ando dabr s'uwanatse itok wosh Ik' shuno b wotere t weerindo bkáátsituwok'o jam aawo Ik'o t k'oniri. <sup>11</sup> Imnetiyats it kup'ituwok'o itn woshituwo shayiri imo itsh betsoho, itn bek'osh tewuniruwu. <sup>12</sup> Man ti etiruwere taa it imnetiyon, itwere t imnetiyon no atsatsewo nokup'itwok'owe.

<sup>13</sup> Ti eshuwotso! k'osh k'osh Ik' ash woterawwotsitse ay amantsuwotsi tdatstok'o manko ititsnoru shuwo daatsosh geeyatniye tteshi, ernmó itok wosh ay aawo tk'anere andish bborfetso taash k'ano bk'aztsok'o it

danetwok'o geefe. <sup>14</sup> Salat'antswotsi wotowa salat'anerawotsi wotowa dantsuwotsi wotowa danawu ashuwotsi daniyo fal k'ayaatse. <sup>15</sup> Eshe itsh Romn beyiruwotssh doo shishiyo daniyosh tewuniruwe.

### *Doo shishi aap'o Ik'i angó bwoto*

<sup>16</sup> Taa doo shishi aap'on jitseratse, doo shishi aap'o shino ayhudiyotssh, bíyats aanat Ik' ash woterawwotssh, Mank'o amants ash jamwotsi kashiyosh falit Ik'i angoniye. <sup>17</sup> Kááwu wotituwo imnetiyon kasho daatsituwe ett guut'ere, Ik'i kááw woto doo shishyon bbe'etsotse b́ jamon asho kááw b́ wotit imnetiyone.

### *Ash na'i gondfino*

<sup>18</sup> Ashuwots bogondon aro b́daneerawok'owe bok'aliri, Ik'onowere shato bo k'ztsotse bo gondi jangosh jametsats daaratse Ik' fayó be'etuwe. <sup>19</sup> Boon b́ seziwure Ik' jango dano boosh b́ geyituwok'o Ik'o b́tookon b́kitsre dant boteshtsotsne. <sup>20</sup> Datso bíazetson tuut ashuwotssh be'erawo Ik'i doyo, manuwere dúre dúri bí angonat Izar Izeweri bwoton bí bíazts keewwots weeron sháánt bbe'eyirwonat t'iwintsosh ashuwots bot'afits t'afiyosh bo etetuwo deshatsne. <sup>21</sup> Boweré Ik'o dant bísh wotit mangonat údon imatsne, bohasabiyon woterawo bowoti t'iwintsraw bonibo t'alu b́wtsi, <sup>22</sup> «Dantsuwots noone» ett dartsuwotsi bowoti. <sup>23</sup> Besherauwu Ik'o mangiyoniyere beshit asho aro wotts

ariyetso, Kafon, awd tuf detsts gizuwotsn, dat-satse geetseyiru dins'otswots aron arit finetsu-wotssh mango boími.

<sup>24</sup> Mansh boatsatsewo botook atsats jitsit fino bok'alitwok'o Ik'o kimon s'eents bonib tewunosh keewetswotsi bowotitwok'o k'azb'k'iri. <sup>25</sup> Man bwotuwere Ik' aro kooton bowonit-sosh, aztso shegro azeetso boik'itsonat bish gu-uts bowottoshe, Ik'onmó dúre dúrosh údeke! Amen.

<sup>26</sup> Ashuwots man bok'altsotse Ik'o Woteraw wic'ets tewunosh beshidek't boon bí imi, bo mááts máátswots dab azeewon daneets gonkewo daneerawu gonkeyi naaron woni bok'ri. <sup>27</sup> Mank'o nungushuwotswere daneets gonkewo máátswotswotsnton wosho k'azt boatsatsewo bogúsiyon bomis'i, mansh nungushuwots nungushonton jitsits keewo bofini, bo sheelsti jangosho boosh wotit fayó bomeetson bodek'i.

<sup>28</sup> Ashuwots Ik' dano geyo bok'aztsotse wic'ets keewo bo finituwok'o Ik'o Woteraw nibosh beshidek't imb'k'ri. <sup>29</sup> Mansha morron, gondon, jaalon, weerigondon, okooron, kashúd'on, shid'eyon, dirshon, gond tewunon s'eent, ando oonetswotsiye, <sup>30</sup> Ash shúúts t'afiyruwots, Ik'o shit'iruwots, ash ketiyiruwots, mishetswots, noona boguwotsi etiruwots, gond finosh malo geyiruwots, bonih indosh azazerawwots, <sup>31</sup> T'iwintsde'awwots, keewetso gakiruwots, shuno deshawwots, maac'kup'uwotsiye. <sup>32</sup> «Keewanotsi k'aliru jamwots k'ire boosh wotiti» etiru Ik'o nemo danfetstniye jaman

bok'aliri, k'al mec'ro woterawon, man k'alirwotsnowere bokup'iri.

## 2

### *Ik' angsho*

<sup>1</sup> Nee k'osh ashaats angshirwono nee ntokish bíyats nwebitwo deshatsne, k'osh ashaats ni angshor n tookatse niangshiri, nee k'osh ashaats angshfetsat, n angshits ashman b k'alirwoniye nk'aliri. <sup>2</sup> Mank'o k'aliru ashuwotsats, Ik'o boosh wotituwo boosh b angshiruwok'o danfone. <sup>3</sup> Nee ashono! mank'o k'aliru ashuwotsats angshfetsat, bo bok'aliruwo nk'alor Ik' angishi shirotse nkeeshtok'o neesh arefa? <sup>4</sup> Himo Ik'o b sheeng wotonat jam falk bwoto, noosh b k'amonwere bí ankattsono ngac'iri? Ik'o sheeng b woto noosh bíayiyi, neen n morrosh naandre eto maants jishosh bwotok'o danatsneya? <sup>5</sup> Eshe nee n morrosh naandre eto nk'aztsotsnat maac'o kup' nwottstotse Ik'i fayonat ari angshon bbe'et aawots fayó niats bí ayituwok'owe nk'aliri. <sup>6</sup> Ik'o ik ikuwotssh bofinok'oye boosh b imeti. <sup>7</sup> Sheeng finats kup'de'er údonat mangon t'afrawu kashonowere geyiruwotssh Ik'o boosh dúre dúri kasho imetuwe. <sup>8</sup> Botooki keewo geyiruwotsi, ari keewosh azazerawwotsnat gondosh azazeyiru gonduwotsatsomó Ik'i fayonat kaak k'iro boats weetuwe. <sup>9</sup> Shin shino ayhudiwotsats maantsnowere Ik'i ash woterawwotsats gond finiru ash jamwotsats gond bek'onat kic'on weetuwe. <sup>10</sup> Ernmó sheeng keewo kaliru ash

jamats Ayhudi wotowa Ik'i ashwoterawwotsi wotowa údono mango jeeno boosh imetuwe. <sup>11</sup> Ik'oniye ashuwotsi boga bogshraake.

<sup>12</sup> Nemo bodeshawo morr finiru jamwots nemo bot'ut'alor t'afitúne, nemonowere desh-fetsr morr finiru jamwotsmó nemon bo ats angshetuwe. <sup>13</sup> Ik' shinatse kááwu wotituwots nemo shisht finats jitsiruwotsiye bako nemo shisht finats jitsrawotsiyaliye. <sup>14</sup> Nem deshaw Ik' ash woterawwots bo azeewon nemo bí azaziru keewo kalirune, man weeron nemo bot'ut'aloru botookk wotts azeeyi nemo bodetststotse k'alosh boon bgeyituwo danfnee. <sup>15</sup> Bo keewanúwere nemi etiru jam keewo bo nibats b guut'ets b wotok'o kitsiruwe, aaninuere bonibo boats gawituwe, ikn ikno boon bonibo bgac'iti, ikn iknomomó boon b tep'eti. <sup>16</sup> Han sháánon bbe'etwere, taa t nabiru doo shishi aap'ok'on Ik'o Iyesus Krstos weeron ashuwots ááshon bofints keewats b angshit aawotse.

### *Ayhudiyotsnat bo nemon*

<sup>17</sup> Hamb, nee «Ayhudi taane» etirune, nematse nte'eyiri, Ik'k nwottsosho bogtaana etaat ni'it'iri. <sup>18</sup> Nee Ik' ettso danfnee, Muse nemo ndantsotse sheeng fino danfnee. <sup>19</sup> «Nee dogwotsi jishiruwu taane, t'aluwotse faúwotssho sháán taane, <sup>20</sup> Danawwotssh dano kitsituwe, nanaúwotsno danituwe» nietiri, mank'o, «Muse nemon dano s'eenon detsfe» nietiri, <sup>21</sup> K'oshuwotsi daniruwu nwotor bére ntooko eegishe daniyo nk'azi? úp'mk'ayere nietiri, nemon úmp'e n úmp'iri,

<sup>22</sup> Wido amk'ayere etirune, nemo wide niamiri, nee Woteraw Ik'uwotsi wic'irune, bo Ik' k'oni moowwotsno fa'o nbiik'iri. <sup>23</sup> Nee Ik'i nemwotsne n'it'ri, ernmó bñemman gakat Ik'o ngac'iri. <sup>24</sup> Manuwere, «It ayhudiwotsatse tuutson Ik'i shútso Ik' danawu ashuwotsoke c'ashetwe» ett guut'etsok'one.

<sup>25</sup> Gof amo arikon neesh b sheenget nemo nkotaale, nemo n gaaketka wotiyalmó gof niamo gofo niamawok'owe btaaweti. <sup>26</sup> Mansha gof amaaw Ik' ashwoterawwots jiro nemi tzaziyo bkotetka wotiyal gofo am b k'azo gof biamtsok'o tawetwoshna? <sup>27</sup> Nee guut'ets nemo detstsonat gof amtso wotar nemo ngakal b meetson gof amawo wotar nemo s'eentsiru Ik' ash woteraw jiro níyats angshituwe. <sup>28</sup> Eshe shúúts mec'ron Ayhudi wottso ari ayhudiyalie, mank'owere úratse be'eyiru meetson gof amo ari gof amaliyee. <sup>29</sup> Ari Ayhudiwo bgitsitse Ayhudi wottsoniye, ari gof amonwere Ik'i shayiron S'ayinon wotit nibotse gof amoniye bako nemon guut'etsok'on meetson gof amaliyee. Eshe hannaari asho údo bdek'et Ik'okna bako ashoknaliye.

### 3

#### *Ayhudiyots amano bok'aztsok'o*

<sup>1</sup> Beree ayhudiyots Ik' ashwoterawwotsiyere bok'an eegoneya? Gof amo ayhudiwotssh eebi b k'aliti? <sup>2</sup> Arikon Ayhudi woto ay weeron k'anefe, bog keewo Ik'o aap'o ayhudiyotssh adaro bíimtsoniye. <sup>3</sup> Eshe Ayhudiyotsitsere ik ikuwots



amanek wotar daatseyo bok'azal, bo amanetsuwotsi wotbok'azo Ik'o amanek b́ woto ooritúwa?  
 4 B́ jamon oriratse!

«N aap'ts aap'atse tuutson arikeewetsoniye  
 nwotiti,

N mooshorowere angshon da'itune»

Ett guut'etsok'on ash jamo kootetso b́ wotiyalor  
 Ik'o arikeewetske.

5 Ernmó no morro Ik' kááwo b́ kitsitka wotiyal  
 eshe eebi no'eteti? Ik'o nomorrosh noon b́seziyal  
 kááwon angshratse eteya b́ wotiti? Hanoke t  
 keewiruwu ashkok'one. 6 B́ jamon woteratse!  
 hank'o b́wotitkawotiyal Ik'o datsuwats aak'oneya  
 b́ angshiti?

7 Ernmó kootetsi twoto Ik'o ar keewutsi b́woto  
 kitsre, b́mangi ayono kitsitk b́ wotiyal, bere taa  
 morretsok'o tiyats angshet eegoshe? 8 Ik ik ashu-  
 wots «Bére, Sheeng keewo b́weyish gond keewo  
 eege nok'aliyala?» etaat tdaniruwok'o woshdek't  
 taan bo s'aamiyir, mansh mank'owwotsats ang-  
 shet angsho kááwe.

### *Ash jamo morretsi b́ wottsok'o*

9 Bére no ayhuidiyots Ik' ash woterawwotsyere  
 k'anefone eteya? Mank'o woteratse! k'osh  
 ash jamo Ayhudi wotowa Ik' ashwoterawwotsi  
 wotowa morretsuwotsi bowottsok'o shin shin  
 kitsre. 10 Hank'o ett guut'etsok'on,

«Dab ikonúwor kááwu asho aaliye, ik  
 doonzuwor aaliye,

11 Nibetsonuwere aaliye,

Ik'onowere geyiruwu ikdonzwor aaliye.

- 12 Jametsuwotswere weeratse k'az keshrne,  
Ik wotdek't darwutserne.  
Doo fino finiruwo dab ikdoonzuwor aaliye.
- 13 Bogogo k'eshets dook'oyiye, bo alberonowere  
antelcerne, bonoon keewi shuwonwere  
dawnz marziyok'oyiye
- 14 Bonoonuwere c'ashonat s'aamon bín  
s'eenwtskee.
- 15 Botufo ash úd'osh káárke,
- 16 Boweeratse daatsetuwere t'afonat dash  
aanone.
- 17 Jeeni weeronowere danatsne,
- 18 Ik'onowere b jamon sharaatsne.»
- 19 Muse nemi tzaziyo b s'iilfo nemmaniyere  
dashe fa'úwotsi b'wottsok'o danfone, manatse  
tuutson ashuwots bíyats boweebituwo t'ut't s'k  
bo etiri, dats jamonuwere Ik'i angshi shirots  
wotitwe. 20 Mansha asho konuwor Ik'o shi-  
natse, Muse nemo s'eentson Kasheratse, Nem-  
man b'kitsir ash jamo morretsi b'wotoniye.

*Kááwu woto b'daatset amanone*

- 21 Andmó Ik'o ashuwotsi kááwu b woshit  
weero nemalon b woteraawok'o be'ere,  
manuwere Muse nemonat nebiyiwots  
mas'aafotse gawere. 22 Mansha eshe Ik'o  
b k'osh k'oshirawon Iyesus Krstosi amanon  
amaniru jamosh kááwu woto imetuwe. 23 Ash  
jamwots morro finernre, Ik'o boosh b'imts  
mangonowere t'ut'rnee. 24 Mansh ashuwots  
Iyesus Krstos b k'alts kashiyi fino Ik'i s'aat

---

**3:12** 3:10-12 Dub. 14:1-3; 53:1-3    **3:14** 3:14 Dub. 10:7    **3:17**  
3:15-17 Isa. 59:7-8    **3:18** 3:18 Dub. 36:1    **3:19** 3:19 Dub. 36:1  
**3:22** 3:22 Gel. 2:16

mec'ron kááw wotitune. <sup>25</sup> Ik'o Iyesus Krstosi wosho woshdek't b́ t'intis b́n amanitu jamwots b́ s'atson bomorrosh oorowe eto bodatsishee, Ik'o man b́k'al b́k'amon morr shintso k'azon ar wotts b́took kááwo kitsoshe. <sup>26</sup> And dúranatse Ik'o b́ tookon kááwu b́woto b́kitsir Iyesusi amants jamwotsi kááwu woshoshe.

<sup>27</sup> Haniyak b́n noít'et keewo eebi fa'oni? Eegonor id'atstone! b́n no id'awok'o woshit-wonúwere eebi? Nemo no s'eenirwosheya? Woteratse, ernmó imneti nemone. <sup>28</sup> Mansh eshe Ik'i asho kááwu b́ woshit, asho nemi fino b́kaltsosh b́woterawo imnetiyon b́wottsok'o t'iwintsdek'etwone. <sup>29</sup> Himó Izar Izewer ay-hudiwots s'uzshe Ik' b́woti? Izar Izewer Ik'i ash woterawwotsshor bokooshna? Arikon Izar Izewer Ik' ash woterawwotsshor boke. <sup>30</sup> Ik'o ike, ayhudiwotsi wotowa Ik' ash woterawwotsi bo amanere kááwu woshituwo b́ne. <sup>31</sup> Bére, imnetiyatse tuutson nemo gaketuwone eteya? Iya'a, iki nemo kup'ide'erniye nodetsetiye.

## 4

### *Abraham imnetiyon b́kashtsok'o*

<sup>1</sup> Eshe meetson nonih wottso Abraham daatsre noetetuwo eebi? <sup>2</sup> Abraham kááwu b́wot finona wotink'ere, b́n b́ it'et keewo daatsiyank'e b́teshi, ernmó Ik'i shinatse it'o falratse. <sup>3</sup> S'ayin mas'aafu, «Abarham Ik'on amanere, b́amantsonwere kááwu b́wottsok'o wotatniye b́ish b́taaweyi» etfe. <sup>4</sup> Finiru asho b́ daatsitwo b́í angi k'awnts wottsoni bako b́ish imet

imoniyaliye. <sup>5</sup> Asho sheeng fino bít'ut'alor daḅ morretswotsi Kashitwo Izar Izeweri bíamaniyal bíamantso kááw wotar bích taawetwe. <sup>6</sup> Dawit b́kaaton Ik'o sheeng finalon kááw b́woshit asho awuk'o derek b́wottsok'o b́ kitsor hank'owe bíeti,

<sup>7</sup> «Bo daro boosh oorowe eteetsuwotsnat  
Bomorro boosh ipk'reets ashuwots

Derekne!

<sup>8</sup> Doonzo b́morro bíats b́taawurawu asho  
Deereke!»

<sup>9</sup> Bére, Dawit b́keewuts deeran gofdamiyet-suwots s'uzsheya? Himó gof damiyeraw-wotsshe? Gof daamiyerawtsshowere, «Abraham Ik'o bíamanere bíamantsman bích kááwu wotat b́taaweyi» etrone.

<sup>10</sup> Eshe Abrahamsh b́imnetiyo kááwu wotat bích b́taawe aware? Gof b́amftse shinemó gofo bíamiyake? Gof b́mfetsere shina bako gofo bíamiyakaliye. <sup>11</sup> Abraham gofo b́amfetsere shino b́imnetiyo kááwu wotat b́datsetsok'o kitsosh milikito bích b́wotituwok'o gofo b́ amiye, hanuwere ando gofo boamaawo amanitu jamwots kááwu wotar botaawetuwok'o boosh niho b́wotishe. <sup>12</sup> Mank'owere Abraham gof amtsuwotsshor nihe, gof amtsuwotssh niho b́wottsonuwere gof boamtso s'uzosh b́woterawo b́ gofo b́ amfetsere shino b́detsts imnetiyi shu-utso sha'iruwotsshe.

### *Ik'i keewtson amano*

<sup>13</sup> Abrahamnat b́ naaro datsu b́naatetwok'o Ik'o b́ jangiyo imnetiyon b́daatsts kááwona bako nem kotonaliye. <sup>14</sup> Ik'o b́jangitsman naatetwots

---

**4:7** 4:7-8 Dub. 32:1-2    **4:11** 4:11 Aze. 17:10    **4:13** 4:13 Aze. 17:4-6; 22:17-18; Gel. 3:29    **4:14** 4:14 3:18

nemo s'eentsde'e kotet ashuwotsi wotiyalma imnetiyo k'awuntso deshatsé, bjangtsonwere k'awuntsalke. <sup>15</sup> Nemo b̄dowet Ik'i faye, ernmó nemo bíaalink'e morro berawuk'ee.

<sup>16</sup> Mansh Ik'o bjangitsman bodaats imnetiyona b̄ tesh, Ik' jangitsanwere Abraham naar jamwotssh Ik'oki s'aaton imek b̄woto arikee. Manúwere nemo shoydek't sha'iru ashuwots s'uzsh b̄woterawo Abrahamkok'o amants jamwotsshe, mank'onowere Abraham noúnetssh nihe <sup>17</sup> Abraham jangosh, «Ay ashuwots niho neen woshre» ett guut'ere, bí k'irtsuwotsi tuuzituwonat aalo b̄ fa'ok'o woshituwo Izar Izeweri bí amantsotsne. <sup>18</sup> Abrahamsh n naaro ayider ayituwe ett keewetsok'on ay ashi niho b̄wotituwok'o bí amananat b̄ jang egoru jangosh wotit keewo bíalefere. <sup>19</sup> B̄ idmewo bal natok'o b̄teshtsotse b̄ meetso b̄maawutsotse k'irts ashok'o b̄wottsotse shuwo b̄falrawonat Sarawwere mahanat gawertsu b̄wottsotse shuwo b̄falrawok'o b̄danaloru b̄ imnetiyon maawk woteratse. <sup>20</sup> B̄ imnetiyon kup' wotat Ik'osh manga b̄ imi bako Ik'o b̄ish b̄ jangitsatse aman k'azoon b̄jamon hakebaka eraatse. <sup>21</sup> Ik'o b̄jangitsonowere s'eentsitwo b̄wotok'o b̄ maac'i s'eenona bíamnefo b̄teshi. <sup>22</sup> Mansha b̄ amantso kááw wotat b̄ taaweyi. <sup>23</sup> Ern mó, «Kááwu wotat b̄ish taawere» ett guut't aap'etso Abraham s'uzsh b̄woterawo <sup>24</sup> noshorniye, nodoonz Iyesusi k'irotsé tuuztso Izar Izeweri amaniruwotssh nooshor no amantso kááwu wotar b̄taaweti. <sup>25</sup>

---

**4:16** 4:16 Gel. 3:7    **4:17** 4:17Aze. 17:5    **4:18** 4:18 Aze. 15:5  
**4:19** 4:19 Aze. 17:17    **4:25** 4:25 Isa. 53:4-5

Nodoonz Iyesuswere no morrosha ett k'irosh beshyat bimeetsonat nonowere kááw woshosh k'irotsé tutsoniye.

## 5

### *Imnetiyon daatset jeenonat manon*

<sup>1</sup> Eshe no kááw woto nodaats amanon b wottstotse no doonz Iyesus Krstosn Ik'onton jeeno detsfone. <sup>2</sup> And kup'dek'at nodatseyiru s'aatok nokind bín amanon bwottstotse Ik'o noosh bjangits b mango kayitwotsi nowottstosh mann it'irwone. <sup>3</sup> Hanmec'ron bwoterawo gond bek'o k'amo noosh bdaatsitwok'o nodantsotse noo gond bek'on it'iruwone. <sup>4</sup> K'amotsnowere fadeyar kup'o, kup'otsnowere jangiyetso daatsetwe. <sup>5</sup> Noosh imets S'ayin shayri weeron Ik'i shuno nonibotse b s'eentststotse b jangitso noon jitsiratse.

<sup>6</sup> Maawk wotat nobefere Ik'o biettts aawon Krstos morretswotssha ett bk'iri. <sup>7</sup> Kááw ash shegro wotar k'irit asho daatso ayide'er kic'ike, bwoteferor doo ash shegro kirosh daneraka daatso faletuwe. <sup>8</sup> Ernmó noo morretswotsi wotat nofa'e noshegro Krstos k'irre, manuwere Ik'o noosh bdetsts shuno awuk'o een bwottsoniye bkitsiri. <sup>9</sup> No kááwutso Iyesus Krstos s'atsona wotiyal ikibogshr Ik'i fayotse no kashit bweerone. <sup>10</sup> Noo Ik'o balangarwotsi wotat nobefere bnaay k'iron Ik'onton no manerone, and Ik'onton nomaneyakon b naay kashi weeron iki bogo kashituwone. <sup>11</sup> Han mec'ronaliye, Ik'onton mano bín nodatstso nodoonz Iyesus Krstos weeron Ik'on it'irwone.

*K'iro Adamn, kasho Krstosne*

<sup>12</sup> Ik ashaatse tuutson morro datsuwats b'weyi, morratse tuutsonowere k'iro b'weyi, mank'owere ash jamo morro b'fintsose ash jamats k'iro b'weyi, <sup>13</sup> Muse nemo b' imftsere shin morro datsuwatse fa'e b'teshi, ernmó nemo b'ialtsoke morro b' tookon morrok'o taaweratse b' teshi. <sup>14</sup> B wotiyaloru Adamkok'o nematse beshat morro finerawotsworu dab bo'orerawo k'iro Adamatse tuut Muse ats b' borfetso ash jamatse alo b' daatsi, Adamwere shinomaants weetu Krstossh bí aroniye.

<sup>15</sup> Ernmó Ik'o b' s'aati imo ash morronton nuut-saliye, ik ash morri jangon aywots bo k'irtsok'o mank'o Ik' s'aatonat ik asho Iyesus Krstos weeron daatsets s'aaton imetso ayuwotssh bogshdek't imere. <sup>16</sup> Mank'owere Ik'o beenon b'doots imo s'aati oot'o ash iko morro b'doots oot'ok'oyiyaliye. Ash iko morratse tuutson imetso angsho b'doyi, ay morratse tuutson imets imo kááwe wot b'dowi. <sup>17</sup> Ash iko morratse tuutson k'iro ash jamatse alo b'detsiyakon bére Ik'i ay s'aatonat beenon imetso s'aat bín kashitu ash jamwots Iyesus Krstos weeron kashon naashitune.

<sup>18</sup> Eshe Adam iks'uzo morri fayi angsho ash jamats b'dootsok'o mank'o Krstos ikoko kashi fino ayuwotsi fayotse kishr kasho imetwe. <sup>19</sup> Ash iko aleyo b'k'aztsatse tuutson ayuwots morretswotsi bowottok'o mank'o ash iko b'ialetsatse tuutson ayuwots kááwitune. <sup>20</sup> Morro b'íayitsotse nemo b'weyi, ernmó morro b'íaytsok'on Ik'i s'aato iki bogsh b'íayi. <sup>21</sup> Man b'wowerere k'iratse tuutson

morro bnaashtsok'o mank'o ando aani nodoonz Iyesus Krstos weeron dúre dúri kasho b daatsey-ish Ik'i s'aato kasho imon naashituwe.

## 6

*K'iratse k'aleyok'o morratse galeyar Krstosn beewo*

<sup>1</sup> Eshe eebi noeteti? Ik' s'aato bí ayituwok'o morrats kup'ar beyonowa? <sup>2</sup> Woteratse! no k'iron galetsok'o morratse galetswotsi wotefetsr aawk'oneya morratse kup'ar nobeeti? <sup>3</sup> Krstos Iyesusnton ik wotosh gupets jamwots, b k'irono kaytswotsi wotosh, no guupetsok'o danatsteya? <sup>4</sup> Gupon binton noduuekeyor bk'ironowere kaytswotsi woterone, mansh Krstos Niho mangon k'irotsé b tuutsok'o noowere handr beyon beetu-wone.

<sup>5</sup> B k'iron binton ik nowottsok'o k'irotsé btuwon binton ik wotituwone. <sup>6</sup> No ats morretso no atse btuwituwok'o morrosh guuts nowoto b oritwok'o no ats nato Krstosnton jitetsok'o danfone. <sup>7</sup> K'irts asho morrosh kewewotse nas'o keshre. <sup>8</sup> Eshe Krstosnton nok'iriyakon binton kashon nobetuwok'o amanituwone, <sup>9</sup> Krstos k'irotsé btuutsi jangosh gitlo b k'irawok'onat k'ironuwere biyatse alo bdeshawok'o danfone. <sup>10</sup> K'iroone bjamon iknoto morrosh k'irre, kashon bbeyonmó Ik'oshe bbeyiri. <sup>11</sup> Mank'o it k'iron k'alwok'o k'alewon morratse it k'aletsok'o Krstos Iyesus weeron Ik'osh kashon itbeyirwok'o taawwere.

<sup>12</sup> Mansh morro it ats k'iritwatse alo bdetsetwok'onat it meets tewnosh keewetswotsi



itn b̄woshitwok'o eekk'ayere. <sup>13</sup> Mank'o it atsi kayuwotsi gondosh k'ac'o woshder morrosh kewik'ayere, ernmó k'irotsé tuwat kashetswotsi it wottsok'o woshde'er it tooko Ik'osh t'intsuwere, it atsi kay jamwotsi kááwu finosh k'ac'o woshde'er Ik'osh kewiwere. <sup>14</sup> And it beyir s'aatoniyere dasha bako nemoniyere dash wot b̄k'aztsotse morro itn b̄ keewo geyiratse.

### *Kashi finosh guuts woto*

<sup>15</sup> Eshe eege no eteti? Nemoniyere dash nowoto b̄ oorere s'aatoniyere dash wotar morro finone eteya? B̄jamon woteratse! <sup>16</sup> B̄ish alewosh guutswotsi wotosh it tooko b̄ish it t'iintsiruwosh, b̄ish it aleyirwosh b̄guutsuwotsi it wottsok'o danatsteya? K'irosh morri guutswotsi wee kááwwotosh aleyi guutswots itne. <sup>17</sup> Itiye shin morrosh guutse it teshi, andmó itsh imets danosh it nibon itazazetsotse Ik'osh údo wotowe. <sup>18</sup> Morrosh guuts wototse nas'o keshat kááawu woti guutswotsi woterte. <sup>19</sup> Taa hank'o ashosh b̄wotit noon keew keewon tkeewir ash azeyon maawuk it wottsatsne. Shin shin it atsi kay kayuwotsi bokiimish weeri gondonat nemalon be-yosh guutswotsi woshdek'at it t'intstsok'o andoor itatsi kayuwots bo S'ayinetwok'o kááw wotosh guutswotsi woshde'er t'intswere.

<sup>20</sup> Morrosh guutso ittेशor kááwo fino finosh kic'erak itne b̄teshi. <sup>21</sup> Bére, manoor eebi it daatsi? And iti b̄ jitsiyiruwoniyere okoon eegor daatsatse, keewhan b̄ s'uwo k'ire. <sup>22</sup> Andmó morri guuts wototse nas'o keshat

Ik'o guutsuwotsi itwottotse S'ayin woto daat-situte, weeronwere bs'uwatse dúre dúri kashe. <sup>23</sup> Morrotse daatset k'awuntso k'ire, Ik'oke imet imonmó nodoonz Iyesus Krstosn daatset dúre dúri kashoniye.

## 7

### *Nematse S'ayin woti jango*

<sup>1</sup> Tieshuwotso! han danatsteya? Tkeewir nemo dants ashuwotsshe, nemo ashaatse alo b́ detset asho kashon bbefetso s'uziye. <sup>2</sup> Aab s'iilere mááts amts máátsu b́kenih kashon bbefetsosh b́nton nemon tipekiye, bkenih b́k'iriyalmó btipets nemotse s'aynat keshraniye. <sup>3</sup> Mansh bkenih kashon bbefere k'osh kenihoosh máátso bi amal widetsuniye bish eteti. Bkenih b́k'iriyalmó b́nton btipets nemotse nas'o keshetuwane, k'osh kenihoosh máátso biamalor widetsuni eteeratse. <sup>4</sup> Ti eshuwotso! it keewonuwere hank'oyiye, it Krstos atsi kaywotsi it wottotse k'iron k'alewok'o k'alewon nematse k'alerte, mansh Ik'i finon shuwo noshuwitwok'o k'osho k'irotshe tuutsosh b́ jirwotsi woterte. <sup>5</sup> Meets shunon ananat noteshor nemon tuwiru morri tewuno k'irosh shuwo noshuwish noatsi kayutsitse finefe b́teshi. <sup>6</sup> Andmó noon tipdek' teshts nemo k'iron galet-sok'o no'atse b́ galetsotse nemi tipotse keshrone, mansh haniyere oki b́sh nofinit handr shayiri jishona bako shin guut'etsnat wotts nemi jis-honaliye.

<sup>7</sup> Eshe eebi no eteti? Nemo b́tookon morreya? woteratse! ernmó morro eeg b́ wotok'o nodanish

woshtso nemoniye. Nemo «Tewunk'aye» eto b́k'azik'e tewuno eeg b́wotok'o danawuk'e b́teshi. <sup>8</sup> Morro nemoke waats tzaziyon gowo daatsdek't jam naari tewuno ti'atsotse b́tuwitwok'o b́woshi. Nemo b́ialink'ermó morro k'irke. <sup>9</sup> Shinon nemo b́í aalor taa kashone tbeefoni, nemi tzaziyo b́ watsok'onmó taa tk'irre morro kasho b́daatsi. <sup>10</sup> Kashosh imetso nemi tzaziyo tiats k'iro b́doy. <sup>11</sup> Morro nemi tzaziyo weeb woshdk't taan b́ ant'elci, tzaziyanatse tuutsonowere taan b́úd'i. <sup>12</sup> Mansh nemo S'ayine, tzaziyonuwere S'ayinona, k'ááwonat sheenge. <sup>13</sup> Bére sheeng wotts keewan tiats k'iro dek'waare eteya? Iya'a! ernmó morro, morr wotar b́be'etuwok'o sheeng keewatse tuutson k'iro tiats dek'b́weyi, mansha morro tzaziyatse tuutson iki bog morretso b́woti.

### *Ash bewoots fa'a maak'oro*

<sup>14</sup> Nemo shayiri weero b́wottsok'o danfone. Taamó morri guutso wotosh kemeets meetsik taane. <sup>15</sup> Taa t k'aliruwo danatse, t shunts keewo k'alo k'azat tshit'ts keewo k'alirwe. <sup>16</sup> Eshe taa t k'alir tshunaaw keewoni wotiyal nemo sheeng b́wottsok'o gawituwe. <sup>17</sup> K'alo tgeeraw keewo k'aliruwo tiatsotse fa'a morroni bako taanaliye. <sup>18</sup> Tigitsotse wee tmeets doyetse eegor sheeng keewo k'alosh falaatsetsee. <sup>19</sup> K'alosh tgeyiru sheeng keewo k'alratse, ernmó tgeerawu gond keewoniye tk'aliri. <sup>20</sup> K'alosh t geerawu gond keewoni tk'aliri wotiyal han k'aliruwo tigitsotse fa'o morroni bako taanaliye etee.

<sup>21</sup> Eshe nemo finats b̄jine bek'etuwe, sheeng keewo tgeefere gond keewo tik'altwok'o taan b̄woshiri <sup>22</sup> Tgitsi atson Ik'i nemon geneúwituwe. <sup>23</sup> Wotowa eree nibots nemonton k'efefetst ti'atsotsi kayuwotsitse finiru morri nemosh tipetso taan woshiru k'osho azeewon taan jeep'iruwo ti atsi kayuwotsitse b̄ beyok'o bek'iruwe. <sup>24</sup> Aawuk'o woteraw ash taane! k'iritu tiatsanowere kone taan kashiti? <sup>25</sup> No doonz Iyesus Krstos weeron Ik'osh údo wotowe!

Eshe taa tnibotse, Ik'i nemosh keewetso wotat t meets doyon morri nemosh keewetso wotere.

## 8

### *S'ayn shayiron jisheyar beewo*

<sup>1</sup> Mansh Iyesus Krstosn beeyruwots and boats angshetuwo deshatsno. <sup>2</sup> Iyesus Krstosn datsetuwo kash imetu S'ayn shayri nemo, morronat k'ir dowet nemotse nas'o taan kishre. <sup>3</sup> Ash doyo maawk b̄ wottsatsse tuutson nemo s'eentsosh b̄ falawo Ik'o k'alre, b̄took na'onowere morrets meets aron morri jangosh woshat b̄ meetson morro angshon ok b̄ bazi. <sup>4</sup> Man b̄k'aluwere meets shunon b̄ woterawo no'atsitsi Shayiri shuntsok'on ananiruwotsats noats nemi tzaziy ariko bí b̄s'eentsitwok'owe. <sup>5</sup> Meets shunon beyiruwotsi meets keewo, Shayiri shunok'on beyiruwotsmó Shayiri keewe bogawiri. <sup>6</sup> Meets keewu gawo k'ire b̄ doweti, Shayiri gawirúwok'on wotoonmó kashonat jeenone b̄imeeti. <sup>7</sup> Meets keew gawo Ik'oke shit'eek b̄wottstse Ik'i nemosh

bíalerawotse, kewewono maawre, <sup>8</sup> Meets keewosh kéweyirwots Ik'o geneúsho falatsne.

<sup>9</sup> Itmó Ik' S'ayn shayiro ititse beyiruwe wotiyal Shayiri shúnona bako meets shunon beeratste, Krstos Shayiro deshaw ashonúwere Krstos jiraliye. <sup>10</sup> Krstos itits b́ wotiyal it meetso morri jangon k'irk b́ wotiyaluru Ik'o itn b́ káátstotse it shayiro beyar beetke. <sup>11</sup> Iyesusi k'irots tizts Ik' Shayiro ititse b́beyal, Iyesus Krstosi k'irots tiztso Izar Izewer it gitsitse beyiru shayiri weeron k'iritk wotts it meetsosh kasho imetuwe.

<sup>12</sup> Eshe t eshuwotso! no kashosh kup'o noosh geyife, ernmó noo beyon meets shunok'on beyo noosh geyiratse. <sup>13</sup> Meets shunok'on it beyal k'iritute, ernmó S'ayn Shayiri angon it meets fino it úd'iyal kashon beetute. <sup>14</sup> Ik' Shayiron jisheyru jamwots Ik' nanaúwotsiye. <sup>15</sup> Mansh «Niho! no nihono!» etaat it s'eegirwo na'ok'o woti Shayiro it dek'i bako shatoon beyosh aani guuts woti Shayiro de'atste. <sup>16</sup> Ik' Shayiro no Shayironton wotar Ik' nanaúwotsi nowottsok'o noosh gawituwe. <sup>17</sup> Eshe Ik' nanaúwotsi nowotiyakon b́n naatetuwwots noone, Krstosntonuwere naatetuwwone, andowere Krstos gond bek'o kaytsuwotsi nowotiyal maniyere okoon b́ mango kayituwotsi wotituwone.

### *Weet mango*

<sup>18</sup> And gond bek'an shinomaants noosh be'et mangonton b́ taatseyal eegonuru talosh b́ falawok'o woshde tawituwe. <sup>19</sup> Azets jamo Ik' nanaúwots be'ewo een tewunone

́kotiri. <sup>20</sup> Azets jamo k'awunts deshawosh  
 kewewtsere, manwere ́ took shunon ́  
 woterawo jangde'er ́ kotetwok'o woshts  
 Ik' shunone. <sup>21</sup> Jangiyetsonwere azeetso  
 ́tookon t'afi guuts wototse nas'o kesht Ik'i  
 nana'úwotsnton s'ayinonats mang kayituwo  
 ́wotituwok'oyiye. <sup>22</sup> Azets jamó ik wotat  
 hambetsish ́borfetso na'a it'i kic'on detseyat  
 kash k'as'oke ́beyiruwok'o danfone. <sup>23</sup> Ernmó  
 gúútoke fa'o azeetso s'uziyaliye, S'ayin shayir  
 shintso imets dek'tsuwots noworu no atsi  
 shegr wottso Ik'o nana'ok'o woto kotfetsat  
 nogitsitsi atson gúútoke nafa'oni, <sup>24</sup> No noworiye  
 jangiyetsanne. Ernmó no no jangiru keewo  
 be'etka wotiyal jangeet keewo ́woto oorituwe,  
 be'eyiruwonere kone jangiti? <sup>25</sup> Nobe'aawu  
 keewo nojangiyalmó k'amoon kotetuwone.

<sup>26</sup> Mank'owere awuk'o Ik'o k'ono noon  
 ́geiyitsok'o nodanaawotse S'ayin shayiro  
 nomaawóko noon tep'etuwe, noonon kish  
 keewo falerawo gúúton noosh Ik'o ́k'oniri.  
<sup>27</sup> Ash nibo shuu'at s'iliruwu Izar Izewer S'ayin  
 shayiri asaabiyo eeg ́wottsok'o danfee, S'ayin  
 shayiro amantsuwots jangosh Ik'o ́ k'onir Ik'i  
 shuntsok'one.

<sup>28</sup> Ik'o shuntswotsnat ́shuntsok'onowere  
 s'eegets ashuwots Ik'o jam keewo sheengosh  
 boosh ́k'alituwok'o danfone. <sup>29</sup> Shin  
 ́dantsuwots ́ naayi araar ́ na'onúwere  
 eshu ayuwotsitse k'aab ́wotituwok'o Ik'o  
 shino wotituwe ́iettsotsne. <sup>30</sup> Shino wotitune

bíettswotsi b́s'eegi, b́s'eegtswotsnowere kááwu b́woshi, kááwu b́ woshtswotsnowere b́ mangiyi.

*Ik'i shuno*

<sup>31</sup> Eshe keewan jangosh eege noeteti? Ik'o noonton b́wotitka wotiyal kone noon k'efo faliti?

<sup>32</sup> Ik'o b́ naay ik s'uzosh maac'o b́k'ewerawo noosha ett bíimiyakon b́ naaynton jamkeewo beenon aawuk'oneya noosh ímo b́k'azeti? <sup>33</sup> Ik'o galb'dek'tswotsi kone s'aamituwoni? Boon kááwwotsi woshituwo b́ne. <sup>34</sup> Kone angshituwoni? Bí noshegro k'irre, k'irotsé tuut Ik'o niho k'ani aaromants beedek'tso, nooshowere Ik'o k'onirwo Krstos Iyesusiye. <sup>35</sup> Krstos shunatse noon k'álo falituwo kone? Kic'eemó, gond-bek'e? Gishee himó k'ak'e? Himó araats wote, t'up'ertawemó? Shike? <sup>36</sup> Hanwere

«N jangosh aaw jamó noone úd'eyiri,

Shukeyiru mereerwotskok'o taa weerone»

Ett guut'etsok'one. <sup>37</sup> Eshe noon shuntson b́n keew jamanotsida'adek'on da'atswotsiyere bogfone. <sup>38</sup> Mansh k'iro b́wotiyalor, kasho b́wotiyalor, melakiwotsi bowotiyalor, naashuwotsnor bowotiyal, andfa'o b́wotiyalor, shutsi weetuwo b́wotiyalor, kup'uwotsi bowotiyalor

<sup>39</sup> Danbaan tuuka wotiyalor, dashaanowere gop'awotiyalor, kon naaro wotowa azeetso wotiyal no doonz Iyesus Krstosn nodaatsts Ik'i shunotse noon k'álosh falituwo eegonwor bi-aalok'owo arikon dandek'roone.

## 9

*Ik'o Israe'el ashuwotsi bmarat'tsok'o*

<sup>1</sup> Krstosn arikoniye t keewiri, kooratse, S'ayn shayiron t nibonúwere tkorawok'o taash gawirwe. <sup>2</sup> Een shiyanonat k'ut'erawo kic'on t nibotse fa'ee, <sup>3</sup> Meetson t jag wotts tjiruwo'tssha err taa Krstosatse k'aleyar Ik' c'asho tiyats b'bodink'e shunfee b'teshi. <sup>4</sup> Boye Israe'el ashuwotsiye, na'ok'o wotonat mangi wuliyo nemono b'imi, aron Ik'o bo ik'itywok'ono b'kitsi, b' jangits keewo b'imi. <sup>5</sup> Amants nihwotswere bokne, Krstos meetson b'wáá bo naarotsne, b'íye jamoniyere dambe. Bíwere dúre dúrosh deeretso Izar Izeweriye. Amen!

<sup>6</sup> Wotowa eree Ik' aap'tso wonere etaliye, Israe'el naar jamwots ari Israe'el ashnaliye.

<sup>7</sup> Mank'o Abraham naar jamo Abraham nanaúwotsiye etaliye. Ik'o Abrahamsh «N naaro b' keshetiye Yisak'ne» b'íettsoshe, <sup>8</sup> Mansh meetson shuwetswots Ik' nanaúwotsiyaliye, ernmó naaro wotar taawetuwo'ts Ik'o Abrahamsh b'jangitsok'on shuwetswots s'uziye. <sup>9</sup> Hanuwere Ik'o b'jangits aap'otse «Hambets naton hank'o aawon weetuwe, Sara nungush na'o shuwitwane» etke b'teshi.

<sup>10</sup> Man mec'ro b' woterawo Rbk'aa naruwo'tssh niho wottsosh Yisak'sh nungush nana'a maatúwotsi b' maac'ro, <sup>11</sup> Ik'i marat' marat'o finon b'woterawo b's'eegon b'woto kitsosh git nan'úwots boshuwewonat gondonowere sheenonowere bok'aloniyere shino <sup>12</sup> Ik'o Rbk'ash



«Eenfo múk'efosh keewek wotituwe» bí eti. <sup>13</sup> Manúwere «Yak'obi shunre Esawunmó shit're» ett guut'etsok'one.

<sup>14</sup> Eshe eege noeteti? Ik'o boga bogshirwe eronowa? Bjamon mank'o woteratse! <sup>15</sup> Ik'oniye Musesh «Bísh doosh tgeyruwosh doow-ituwe, bísh maac' k'ewo tgeyruwoshower maac'o k'ewituwe» etre. <sup>16</sup> Eshe Ik'i marat'o bdaatset ash shunonash finon bwoterawo Ik' downon bwottsatsne. <sup>17</sup> Manatse tuutson S'ayin mas'aafotse Gbs' nugúsosh «Neen tiango kitsr tshútsonower dats jamatse bdaneetuwo k'o woshosh neen naashiyire» ett aap'etso guut'ere. <sup>18</sup> Mansh eshe Ik'o bshuntsosh maac'o k'ewefe, bshuntsongwere k'el kúp'etso woshituwe.

<sup>19</sup> Eshe «Ik'i shunts keewo k'efosh konuwor falratse, béré bí ashuwots bo shuntso bo fintsoosh eegishe boon b' b's'aamiyiri» err taan aato falfete. <sup>20</sup> Nee ashono! Ik'onton mooshosh eegoneya nfali? Shalon dozets k'ac'o bín dooztsosh «Eegishe hank'o kaldek'at taan ndoozi?» etosh falituwa? <sup>21</sup> Eshe shal wozirwo iknaari shali tok'ootse k'ac' iko mangosh, k'oshonower ketts finosh woshde wozosh alo deshatsá?

<sup>22</sup> Ik'o bfayo kitsosho bíangonower bek'shosh geeyat t'afiyosh k'antsuwotsi fayi k'ac'uwotsi ayoto k'amare wotiyal eendani? <sup>23</sup> Han b' k'aluwere shin mangosh bk'anitso sheeng bwoto dek'ets k'ac'uwotssh bmangi ayo kitsoshe. <sup>24</sup> Sheeng b' woto dek'ets k'ac'uwotshmó ay-hudiwots mec'rotse bwoterawon Ik'i ash woter-

---

**9:13** 9:13 Mil. 1:2-3    **9:15** 9:15 Kesh. 33:19    **9:17** 9:17 Kesh. 9:16    **9:20** 9:20 Isa. 29:16; 45:9

awwotsitsnowere noon s'eegree. <sup>25</sup> Hanwere  
nebiyiyo Hose'n hank'o eteetsok'one,  
«Tiash teyawuwotsne <Tiashuwotsi> err  
s'eegetuwe,

Shuneerawu ashuwotsnowere <Shuneeka>  
err s'eegetuwe,

<sup>26</sup> Itiye <Tiashuwots itnaaliye> eteets beyokoke  
<Beyat beets Ik'o nanaúwotsi> err boon  
s'eegetuwe.»

<sup>27</sup> Isayasuwere Israe'el jangosh hank'o  
eton b̄ k'ááro eenshdek'tine b̄keewi, «Isra'el  
nanaúwots taawo aats k'aritsi shiyok'o dab  
bíayiyaluru boyitse kashituwots múk'nee. <sup>28</sup>

Doonzo b̄ ja'arawo kááronat s'eenon bí angsho  
imetwe.» <sup>29</sup> Mank'owere Isayas «Dari jirwotssh  
doonzo shooko noosh oriyo b̄k'azink'ere  
Sedom kituk'o wotiyank'one b̄teshi

Gemor kitukok'o wotiyank'one b̄teshi»  
ett shin shin keewure.

<sup>30</sup> Eshe eege no keewiti? Kááwi weero  
sha'erawu Ik'i ash woterawwots kááw woto  
bodaatsi, kááwo wotonwere amanar daatsetu-  
woniye. <sup>31</sup> Ernmó kááw woto daatsit nemo  
shuuts sha'at teshts Isra'elots, nemo s'eentsosh  
bomawutsotse kááwok boratsne. <sup>32</sup> «Eegoshe  
kááwok bodobok'azi?» eteyala bo kááw

wottso daatsosh boge amanon b̄woterawon fi-  
non b̄wottsotsne, manshe t'ugwotsn bo k'is'eyi.  
<sup>33</sup> Manuwere

«Hambe! ashuwotsi k'is'iru shútso S'iyonits  
beezree,

Shútsanuwere ashuwotsi k'ic'de'er dikitu  
s'aloniye,  
Bín amanituwonmó jüitsratse»  
ett guut'etsok'one.

## 10

*Esra'el ashuwots Ik' weerindon sha'o bok'aztsok'o*

<sup>1</sup> Ti eshuwotso! t maac'otse beyiru een tewunonat Ik'o maants t t'intsiru k'onon Israe'el ashuwots bokashituwok'owe. <sup>2</sup> Ari danon woto b k'aztsosha bako bo Ik'osh okooro bo detst-sok'osh taa boosh gawituwe. <sup>3</sup> Ik'o ashuwotsi kááw b woshit weerindo bodartstotse bo took kááw weerona bosha'i bako Ik' kááw weeron sha'eratsnee. <sup>4</sup> Ash jamo imnetiyon kááwo b wotish nemi s'uwo Krstosiye.

<sup>5</sup> Nem kotón daatset kááw woto Muse b guut'tso «Nemo fenats jitsiru jamo kashon beetuwe» etiruwoniye. <sup>6</sup> Ik'o ashuwotsi imnetiyon kááw b woshtsok'onómó hank'o ett guut'ere, «N nibon daro maants kone kesheti?» etk'aye, hanúwere Krstosi orshoshe, <sup>7</sup> Wee n nibon «Si'olits kone ot'eti?» etk'aye, hanúwere Krstosi k'írotse tizoshe.

<sup>8</sup> Dabtnu hank'o ett guut'ere, «Ik' aap'tso n ganoke, dab nnononat n maac'otse,» keewanúwere no nokeewiiru imneti aap'oniye.

<sup>9</sup> Iyesus doonz bwotok'o nnonon ngawiyal, Ik'o k'írotse bín btiztsok'o n maac'on niamaniyal kashitune. <sup>10</sup> Asho b maac'on amanan kááwituwe, bnonon b gawiyal kashituwe, <sup>11</sup>

S'ayn mas'aafotse guut'etsok'on, «Bín amants jamo jitseratse.» <sup>12</sup> Eshe ikosh doonz wottso jamosho doonz b'wottsosh ayhudiyonat ayhuidiy woteraw dagotse eegoru k'osh k'osheyo aaliye, bín k'oniru jamosh b's'aato ayide'er imetuwe, <sup>13</sup> «Doonzo shúúts s'eegiru jamo kashituwe» eteere.

<sup>14</sup> Ernmó bo amaneraniyere aawuk'oneya s'eegosh bofaliti? B jango booshiyaniyere aawuk'oneya bo amaniti? Nabirwo alonomó aawuk'oneya shishosh bo faliti? <sup>15</sup> Nabirwotsi wosheerawonomó aawuk'oneya nabosh bo faliti? Hanuwere, «Doo keewuman shishituwots wáá woo awuk'owe b'geneúshiti!» ett guut'etsok'one. <sup>16</sup> Ernmó Isayas, «Doonzono! no no aap'tso kone amani» ett b' keewtsok'o, jamwots doo shishiy keewo de'atsne. <sup>17</sup> Eshe imnetiyo b' daatset k'ebokne, k'ebetuwonúwere Ik'i aap'otsoniye. <sup>18</sup> Aab aatuna, eshe, b' keewts keewo shiyatsno eteya? S'ayin mas'aafotse, «Bo k'aro dats jamats b'shiyeyi,

Bo aap'ts aap'onuwere dats daarats b' bodi» ett guut'etsok'on, arikon shishrne. <sup>19</sup> Israe'el ashuwots b' aap'tso danatsno eteya? Han eterawok'o Muse shinon

«Gac'ets ash ashon okoriyat itn tgoyni,

T'iwitsrawu ash ashon itn tfayi» eteere.

<sup>20</sup> Isayasuwere,

«Taan geerawwotssh tdatseyi,

---

**10:12** 10:13 Iyu. 2:32    **10:13** 10:13 Iyu. 2:32    **10:15** 10:15  
Isa. 52:7    **10:16** 10:16 Isa. 53:1    **10:18** 10:18 Dub. 19:4  
**10:19** 10:19 Iwi. 32:21    **10:20** 10:20 Isa. 65:1

«Ik'o aawoke?» ett  
 Taan aatrawwotssh tbe'eyi,»  
 ett ááwushúk'on keewure. <sup>21</sup> Israe'el  
 ashuwotsshomó «Azazerawonat gond ashuwots  
 tmaants boweetwok'o aawu jamo tkishuwotsi t  
 jargi» etre.

## 11

### *Ik'o Israe'el ashuwotsi bjamon juu bk'aztsok'o*

<sup>1</sup> Aaß dab neen aatuna, Ik'o bí ashuwotsi juuwera? B jamon juweratse! taa ttookon Israe'el ash taane, Abraham naaro wotat Biniyam jirots taane. <sup>2</sup> Ik'o shini b marat'ts ashuwotsi juweratse, S'ayn mas'aafo Eliyas jangosh eeg bíettsok'o gawatsteya? Dab Eliyas Israe'el ashuwotsi Ik' shinatse awuk'o ett b s'aamitsok'o danatsteya? <sup>3</sup> Manoor Eliyas «Doonzono! nebiyiwotsi úd'rne wosh t'intseyiru t'arap'ezono gaakrne, ts'uziye oori, taano úd'oshe bogeyiri» etre b teshi. <sup>4</sup> Ernmó Ik'o eega ettniya bísh bíaani? «Ba'ali eteets dozets ik'osh tuk'umalerawo shawat kúm ashuwotsi tokish ooridek're» etre bísha. <sup>5</sup> And dúranatse b'wotsiyal, s'aaton marat'ere ortsuwots muk' Israe'el ashuwots fa'ane. <sup>6</sup> Marat'onwere s'aaton b wotiyal finonaliye etee, finon b wotiyal, s'aato s'aat b woto orerere etee.

<sup>7</sup> Eahe b k'awuntso eebi b'wotiti? Esra'el ashuwots bogetso datsatsno, marat'etswotsmó bo geyiruwó daatsrne, oortsuwotsmó bo maac'o bokup'i. <sup>8</sup> Hanuwere «Ik'o bo nibo b

dúngiyi, mansh eshe hambetsish b́ borfetso bo ááwo be'atse, boowazonuwere shiyatse» ett guut'etsok'one. <sup>9</sup> Dawitwere,

«Bomishi maronu detset kambo,  
dikit gop'o wotar boon kic'ituwe!  
bofiniru gond fino botokats boree!

<sup>10</sup> Bo ááwo b́ be'awok'o t'aluwowe,  
bojik'o gond bek'on jam aawo k'urowe» etre.

<sup>11</sup> Aab aani neen aatuna, ayhudyots bodihi aani boturawok'o wotatniya? Mank'owaliye! ernmó ayhudyots gondo bo fintsi jangosh Ayhudi woterawwots kasho bodaatsi, han b́wotiye ayhudyots Ayhudi woterawwotsi bo ookoritwok'o woshoshe. <sup>12</sup> Ayhudyots gond fino dats jamosh deero datsire, bodiho Ik' ash woterawotssh deero wotere, Ayhudi jamwots bookashink'ee deero awuk'o aye b́wotiyank'oni!

*Ik' ash woterawwots bokashitwok'o*

<sup>13</sup> And nokeewir itsh Ik' ash woterawwotsshe, Ik' ash woterawwotssh wosheetso twotssok'osh t finosh mango taash shiyeetuwe, <sup>14</sup> T meets jag wotts ayhudiwotsi okooriyoshe, mank'onowere daneraka ik ikuwotsi kashiyo falituwe etee.

<sup>15</sup> Ik'o boon b́ juwoor datsatsi ash k'oshuwots Ik'onton b́ manetka wotiyal Ik'o boon b́ dek'or eeg b́wotituwok'o arefa? Haniyere k'irotsse tuwok'oyi etee!

<sup>16</sup> Ik naari boot'otse shintsotsi kayo S'ayinka wotiyal boot' jamo S'ayinkee b́ wotiti, mank'o mit iko bs'ap'o S'ayina wotiyal b́ jabwotswere S'ayine bowotiti. <sup>17</sup> Worfitsi woyra eteyiru mit jaabo wotts ayhudyots k'ut'eyar bodihitka

wotiyal it boditsi woyiriy mit jaabo wotts Ik' ash woterawwots bo shegro shááto shegrshr weyiri zeyito bítse b́keshiru s'ap'ootse keshiru gaalonat deeron kaytsuwotsi itwotiyakon, b́ jaabwotsats ít'k'ayere. <sup>18</sup> It Ik' ash woterawotso jaabwotsats ít'k'ayere, it it'alomó it jaab mec'ro it wottsosh s'ap'oni itn kuriti bako it b́ s'ap'o kurirwotsi itwoterawok'o dande'ere.

<sup>19</sup> Ernmó «Jabúwots tishat bodihi, taa bo beyok tikinditwok'o» etaatne b́ teshi. <sup>20</sup> It ettso aree, ernmó bo k'ut'at bojuwe amano bok'aztsosh b́ wottotse itwere k'up'at it ned'iye itamantsoshe, eshe, shata bako hit'o itn geyiratse. <sup>21</sup> Ik'o azeewon jaab wotts ayhudiyyotssh maac'o k'ewo b́ k'aziyakon itsh maac'o k'eweratse. <sup>22</sup> Eshe Ik' doowonat Ik' shatiyon aab s'iilere, b́ shatiyonu b́kitsir dihitswotsats b́ wotor b́ doo wotonu b́ kitsir itshee, hanowere b́k'alir b́ downon k'up'ar it betka wotiyalemó b́ doo itsh wotituwe, kup'o itk'azalomó itwere k'ut'eyarniye it dihiti. <sup>23</sup> Ayhudiyyots bo amaniyal yoots bobeyok aanitune, Ik'o yoots bobeyok boon aaniyosh falituwe. <sup>24</sup> It Ik' ash woterawwotsmó azeyon boditsi woyiri miti jaabo wotat teshtsuwots it beyokalo worfotsi woyiri mitats tokeyo it faliyakon hanots bo azeyon worfotsi woyiri miti jaabo wotts ayhudiyyotsmó yoots bobeyok aanar tokeyo aawuk'oneya boosh b́ maaweeti!

*Ik' mhretiyo jamosh b́wottsok'o*

<sup>25</sup> Ti eshuwotso! «Danfone» err ít'k'ayere itsh tkeewitwo ááshts keewo fa'ee, bíwrer Israe'el ashuwots k'azts woto b́ jamosh b́woterawo Ik'

ash Woteraw jamwots s'eenon Ik'ok bowafet-soshe. <sup>26</sup> Eshe hank'on Israe'el asha ash jamwots kashitúne. Mansh hank'o ett guut'ere,

«Kashituwo S'iyonn weetuwe,  
Yak'ob naar jamatse gondo wokiituwe,

<sup>27</sup> Bomorro boosh t t'afiyor  
bonton tkindit taaro haniye.»

<sup>28</sup> Israe'el ashuwots doo shishiyosh aap'etso dek'o bok'aztsetse, itjangosh it Ik' ash woterawotssh bdooyish Ik'osh balangaro bowoti, bomarat'ewonmó nihiwots jangats tuutson Ik'o boon shunknee. <sup>29</sup> Ik'o noon marat'de'er b deero bí imiyakon b k'alts keewumansh bgawtso woniratse. <sup>30</sup> It Ik' ash woterawwots shin Ik'osh alerawwotsiye it teshi, andomó ayhudyiyots aleyo bok'aztsetse it Ik' maac' k'ewo it datsi. <sup>31</sup> It maac' k'ewo it daatstsok'on boowere maac' k'ewo bodatsituwok'o boowere and Ik'osh alerawwotsi woterne. <sup>32</sup> Ik'o b maac' k'ewo ash jamosh kit-sosha ett ash jamwotsi ale k'azon is'k'reroshná.

### *Ik'osh t'int's údo*

<sup>33</sup> Ik' gaalona, dani telefonat danoonúwere awuk'o eene! bí angsho fal bíats boderake, b werindonu danerake.

<sup>34</sup> «Ik' hasabiyo danetuwo kone?  
Bísh iztsi wotituwonmó kone?

<sup>35</sup> Ik'osh gushituwonat  
b gushitsono dek'etuwo kone?»



<sup>36</sup> Jam keewo b́ daatse bíyokne, jam keewo bíne b́beeti, jam keewo b́she b́ beeyeti, dúre dúron mango b́sh wotowe! Amen!

## 12

### *Ik'osh finosh awuk'on beyo b́geyituwok'o*

<sup>1</sup> Eshe eshuwotso! Ik'o genee'úshitwo, beyar beetwonat S'ayin wosho woshde'er it atso it t'intsitwok'o maarts Ik'o shútson itn k'onirwe. Manowere t'intso itn b́ geyitso ari Ik'osh finet finoniye. <sup>2</sup> Sheengonat genee'úshitwo kim de-shawonowere Ik'o shuntso fadbek'o it falitwok'o it nibi gawirwon handraar, it beyo woneewa bako datsani ark'ayere.

<sup>3</sup> Aaninuwere it ik ikets Ik'o itsh b́imts im-netiyok'on tooko dashan detson asaabore bako it angoniyere danb it tookosh bogotaane err asaabk'ayere ett taash imets s'aaton keewirwe.

<sup>4</sup> No ats ikatse ay kayuwots fa'ane, noatsi kay ik ikonuwere k'osh k'osh fino detsfe. <sup>5</sup> Mank'owere noo ayuwotsi wotat nobefere Krstosn ik ats noone, ik atsi kayuwotsi nowottsok'on noatsatsewo desheeknone.

<sup>6</sup> Mansh Ik'o b́ s'aaton noosh b́ ímets k'osh k'osh naari deero finats jítswone, noosh imetso Ik'o aap'ts keewa wotiyal no amantsok'on Ik' aap'tso keewwone. <sup>7</sup> Noosh imetso k'oshwotssh fina wotiyal kup'ar finone, noosh imetso daniya wotiyal sheengshde'er daniwone, <sup>8</sup> noosh imetso iza wotiyal izwone, noosh imetso tuwdi dowawotiyal nib s'eenon imone, noosh imetso ashuwotsi k'eeza wotiyal kup'ar

k'eezwone, noosh imetso mihretiya wotiyal hanowere gene'on k'aluwone.

<sup>9</sup> Git alber deshaw ari shunewo t'ut'k'ayere, gond keewo shid'ere, sheeng keewi shuutso sha'ore. <sup>10</sup> It ats atsewo eshuwwots shunon shunewere, it ats atsewosh mango imosh no-hewere, <sup>11</sup> mawuk'ayr, Shayron aat'iruwotsi wotoore, doonzosh keewewere. <sup>12</sup> Jangiyetson gene'owere, gond bek'o k'amoore, jam aawo Ik'o k'onwere. <sup>13</sup> Amants eshuwotsi bokic'or te'úwewere, ibwotsno ibíewre.

<sup>14</sup> Itn gishirwotsi deerwere, derwere bako c'ashk'ayere. <sup>15</sup> Geneúwirwotsnton gene'ore, epiruwotsnton efere. <sup>16</sup> It ats atseyo ik hasabiyon ikwotar beewere, it tooko danbaan deshr bog taana eto k'ayr\* t'owwotsnton ik wotar beewere. It tookosh danfone etk'ayere.

<sup>17</sup> Ash jami shinats sheeng wotts keewo k'aluwere bako, ashuwots itats gond keewo bok'aliyal, it aanide'er gondo boosh k'alk'ayere. <sup>18</sup> Itsh b faleyal ash jamonton jeenon beyosh it weeron it falitu jamo k'aluwere. <sup>19</sup> T jir-wotso! fayo Ik'osh k'ayere boko it it tookon weero oorshk'ayere, «Weer weershtwonat weer worshi gushono anituwo taane etfe Doozo Ik'oni» ett guut'ere. <sup>20</sup> Mansh weer worshoniyere n balangaro bk'ak'iyal mazuwe, bshashuwiyal shashuwo kishwe, hank'o n k'aliyal goyinar b jitsituwok'o woshitune. <sup>21</sup> Mansh gond keewo

---

**12:14** 12:14 Mat. 5:44; Luk'. 6:28 \* **12:16** 12:16 Bog taana et k'ayere: T'owwotsnton ik wotar beewere,, wee gac'ets fino finosh it shúno wotowe. **12:19** 12:19 Iwi. 32:35 **12:20** 12:20 Ari. 25:21-22

sheeng keewon da'úwere boko gond keewon da'ek'ayere.

## 13

### *Mengsti naashuwotssh alewo bgeyitsok'o*

<sup>1</sup> Konuworu naash wottso b daatsit Ik' shunon b wottssotse and datsk'eziruwots bo naash Ik'on b wottssotse ash jamo naashwotssh alewo bish geyife. <sup>2</sup> Mansh naashuwotsi k'efitu jamo Ik' aloniye bk'efiri, aleraw jamonuwere sezi angshoyo b tookats dowetuwe. <sup>3</sup> Dats k'eziruwotsi shatet gond finirwotsi bako sheeng finiruwotsiyaliye, naashuwotsi shat k'azo geefneya? Bére sheeng fino finowe, booke údo daatsitune. <sup>4</sup> Naasho neesh sheengo b k'alituwok'o naashiyets Ik' guutsoniye, dats k'eeziruwo shiki gorado bí'ed hank'on woto bk'aztsotse gond fintso nwtiyal dats k'eeziruwo share, bíwere gond finiruwotsi sezosh Ik' weer wershono kitsr Ik'osh finitune. <sup>5</sup> Mansh mengst naashuwotssh alewo itsh geyife, it aletwere Ik' fay mec'ro shatoon b woterawo it nibo itn b gac'ituwosh woto geyituwe.

<sup>6</sup> Ereero it imiru manshe, naashuwots finan finosh botuu Ik'osh finoshe. <sup>7</sup> Eshe danbi naashuwotssh k'alo geyituwu jamo k'aluwere, ereero bish wotituwosh ereero, t'ilisho bish wotituwosh t'ilisho imere, shatetwono sharere, mango bish wotituwosho mango imere.

### *Ats atseyo shunewo*

<sup>8</sup> Kon k'awuntsonúwor itatse beek'aye, itatse beeyet k'awuntsoniye itats atseyo shúnee mec'r wotowe, ash shunetuwo nemo finats jitsre. <sup>9</sup> «Wido amk'aye, úd'k'aye, úmp'k'aye, k'osh ashk wotts keewu jamo tewunk'aye» etiru tzaziy-otsnat k'osh tzazi jamwots, «Asho ntookok'o woshde'er shune» etiru ik tzaziyotse ko'eyat bofa'oni. <sup>10</sup> Ash shuniru jamo b shuniru ash manats gond keewo k'alatse, mansh ash shuniruwo nem jamo finats jitsre etee.

<sup>11</sup> Eshe tokrotse it tuwit sa'ato and b bodtsok'o dande'ere, shini noamanortsoniyere bogo and no kashit aawo iki nomaants t'inre. <sup>12</sup> T'úwonu beshe b beshiri, aawonu t'inree, eshe t'aluwotse fineyiru finon fink'ayone, sháánon bin finet kes'i tahono tahade'one. <sup>13</sup> Weral míshon, mashon, widonat máátsonat nungushi iko ikats keshon, fayonat okooron b woterawo aawu shanon beyiruwu ashuwotskok'o s'ayinon sha'owone. <sup>14</sup> Eshe Doonzo Iyesus Krstosi tahade'ere bako it meets shuni shashuwo kishosh gawuk'ayre.

## 14

### *Ashaats angshk'azo*

<sup>1</sup> Ititse b imnetiyon maawuk wotts asho b keewo de'ere bako b took asaabiyats moosho tuuzk'ayere. <sup>2</sup> Dab ash iko konnari keewo móósh faliyit imnetiyo detsetwe, b imnetiyon kup'eraw ashonmó worfi maay mec'ro meetuwe. <sup>3</sup> Mansh jam keew meyiru asho mááraw asho gac'k'aye, máárawonwere meet asho ats angshk'aye, Ik'o bínowere dek're. <sup>4</sup> Bére, ash k'oshi guutso ats

angshiruwan nee kone? Bí b́ need'iyal wee b́ dihiyal b́ doonzo kis'e. Dab Ik'o b́n need'iyó b́ falituwotse kup'ar need'ituwe.

<sup>5</sup> Mank'o aawu iko aawu ikoniyere bogo mangfe et gawiruwo beyo falituwe, ando k'oshonu aawu jamwots mango taale bako aawwotsitse bogabogo aaliye ett asaabirwe. Eshe hanan arts keewwotsatse asho ik ikon b́nibots b́amantsok'o woshuwe. <sup>6</sup> Ik aawo k'osh aawoniyere bogshde'er mangiyituwo b́ beyal han b́ k'alirwe doonzo mangosha etniye, jam naari mishono meyiruwo doonzo mangosha etniye b́meyiri, b́ meyiru mishosh Ik'o údituwe, jam naari mishono marawo doonzo mangosha err maratse, maa b́ k'aztsotsno Ik'o údituwe. <sup>7</sup> Noyitsere ikonuworu b́ kashon wotowa b́ k'iron b́tokkaliye. <sup>8</sup> Nobeyalo doonzosha nobeeti, no k'iriyalo doonzosha no k'iriti, eshe nobeyalo, nok'iriyalo doonzok noone, <sup>9</sup> Eshe Krstos k'irt k'irotsé b́ tuu kashon betuwotsnat k'irtsuwotssh doonz wotoshe. <sup>10</sup> Bére, nee n eshuwats eegoshe n angshiri? Wee ni eshuwi eegishe n gac'iri? No únets Ik' angshi jori shinats ned'ituwone.

<sup>11</sup> Manwere, «Taa kashon betuwo taane etfe Ik'oni,  
Ash jamo b́ gurbon tshinatse tuk'umalituwe,  
B́ alberon taa Ik' twottsok'o gawituwe» ett guut'ere.

<sup>12</sup> Eshe notook tookon no took fini jangosh Ik' shinats t'inr aatetwone.

*Ashosh t'ug wotatse aats kordek'o*

13 Eshe iko ikats angshk'aye, ernmó ashó b̃ eshuwsh weratse kambo wee t'úgo gedk'azosh no atso korde'one. 14 Ik keewo kiime err asaabiru ashosh keew man kima b̃ wotiti bako kon naari keewonworu b̃ tookon kim b̃ woterawok'o taa doonzo Iyesusn t'iwintsdek' danre. 15 Nee n meyiru mishi jangon ni eshush t'ugo n wotiyal shúnonaliye nbeyiri, eshe Krstos b́sh b̃k'irts ashó n meyiru mishi jangon b̃ t'afitwok'o woshk'aye. 16 Eshe itoke sheeng keew wotts keewo k'oshuwots bok'efetuwok'o woshk'ayere. 17 Ik' mengsto S'ayin shayiron datsetsetk kááwe, jeenonat gene'ona bako, móónat úshi keewaliye. 18 Han jangosh Krstishh guuts wotts ashó Ik'o geneúshituwe, ashoknowere údeek wotituwe.

19 Eshe jeenwoto b́n datsetuwonat no ats atseyo b́n nokup'it keewon sha'owone. 20 Mishi jangosh Ik' fino gakk'ayone. Mish jamo s'ayine, ernmó k'osh ashosh t'ug wotitu mish móó dáree. 21 Eshe ni eshúsh t'úg wotk'azosh meetso maak'azo, Weyinyon dútssets biro úsh k'azo, wee kon naari t'ug wotituwo fino fin k'azo sheenge b̃ wotiti. 22 Eshe imnetiyan itnat Ik' dagots wotowe, err n amants keewo b̃k'alor b̃ maac'o b́n b̃gac'erawu ashó údekee. 23 B̃ amaneraniyere meyiru ashonmó b̃ k'aliruwo imnetiyatse tuutson wot b̃ k'aztsosh bíyats angshetuwe, imnetiyon k'alerau keewu jamo morre.

## 15

*Ashuwotsi geneúsho b̃ geyituwok'o*

1 No imnetiyon kúp wottswots, mawirwots kuro kurdek'o geyife bako no took mec'ro geneúshitu woto geyiratse, 2 no took tookon k'osh asho b́ imnetiyon b́ kup'ituwok'o b́n t'ak'amituwonat geneúshit keewo k'aluwone. 3 Krstos b́ tooko geneúshratse, dab «Ashuwots neen boc'ashts c'asho ti'ats b́ oot'i» etiru S'ayn mas'aafotse eteetso b́ ats b́ bodi. 4 S'ayin mas'aafotse nodatsituwots k'amonat kup'on, noosh jángo b́beetuwok'o shin guut'ets jamo dano noosh b́ wotituwok'o guut'ere. 5-6 Ik níbon wotde'er ik noonon Ik'o nodoonz Iyesus Krstos nihi, b́n it mangitwok'o, k'amikonat angi kúp'iko Ik'o Izar Izewer Krstos Iyesus shunok'on it atsatsewo ik níbetsuwotsi woto itsh ime.

7 Krstos Ik' mangosh itn b́ dek'tsok'o it jamets iko iko de'e. 8 Hanowere t keewor Ik'o shints nihuwotssh b́ jangitso b́ wotituwok'onat Ik'o arikeewets b́ wotonwere b́ danetuwok'o Krstos ayhudiyyotssh guutso wotere etee. 9 Krstos ayhudiyyots guutso b́ wottso k'osh jango Ik' ash woterawwots Ik'o b́ mhretiyosh b́n bo údituwok'owe, hanuwere,

«Eshe Ik' ash woterawwots dagotse neen udi-tuwe,

n shúútsosh dubon údo t'intsituwe»  
ett guut'etsok'one. 10 Aaninu

«It Ik' ash woterawotso,

Ik' ashuwotsnton gene'owere!» ett guut'ere.

11 Aaninuwere,

«Ik' ash Woteraw jamwots! doonz údoore,

15:3 15:3 Dub. 69:9 15:9 15:9 2 Sam. 22:50; Dub. 18:49

15:10 15:10 Iwi. 32:43 15:11 15:11 Dub. 117:1

Ash ash jamwotswere údoore!» ett guut'ere.  
<sup>12</sup> Ando Isiyas,  
 «Iseyi naarotse shuwetuwo weetuwe,  
     Ik' ash woterawwotssho jishituwo wotar  
     tuwituwe,  
     boowere bojangtso biyats woshdek'etune»  
 etfe.  
<sup>13</sup> It jangtso S'ayin shayiri angon eenfere b̄  
 ametuwok'o jangetso Izar Izewer b̄in it amanet-  
 sosh gene'únat jeenon s'eenon itsh ime.

*P'awlos ááwu shuk'on b̄guut'tsi jango*

<sup>14</sup> Ti eshuwotso! doo woton s'eentsuwotsi,  
 danon gaaltsuwotsnat it ik iketsuwots k'osho  
 izosh falituwotsi itwottsok'o danre. <sup>15</sup> Ik ik  
 keewwotsi itsh gawiyosh geeyat woshan Ik'o  
 taash b̄ imts s'aatok'on ááwushuk'on itsh  
 guut're. <sup>16</sup> Deeranuwere taash b̄ime Ik'o doo  
 shishi keewo Ik'i ashwoterawwotssh shishiyosh  
 kahniyo wotat Krstos Iyesush finoshe, Mansh  
 Ik' ashwoteraw ashuwotssh S'ayin shayiro  
 S'ayintsonat Ik'onowere gene'úshit wosho  
 wotáár bot'inetuwok'o finiruwone. <sup>17</sup> Manatse  
 tuutson Krstos Iyesun Ik'osh fino tfaltsotse  
 it'iruwee. <sup>18</sup> Ik'i ash woterawwots bo aletwok'o  
 woshosh Krstos ti aap'onat finatse tuutson  
 b̄ fints keewo wotiyalabako k'osho aap'osh  
 aawo shu'atse. <sup>19</sup> Hank'owere een adits milikit  
 finuwotsn S'ayin shayiri angon Iyerusalemnat b̄  
 gúúratse tuut Elwarik'oni b̄ borfetso Krstos doo  
 shishiyo danire.

<sup>20</sup> Jam aawu t tewuno k'osh asho b̄ agtsats dabr  
 ago b̄woterawo Krstos shutso b̄ shiyerawu beyok



jamok sheeng doo shishiye keewuman daniye. <sup>21</sup>  
 Hanu,  
 «Haniyere shinon b́ jangosh eegoru keewerawu  
 ashuwots bek'etune,  
 b́ jangosh shiyawwots t'iwitsitunee»  
 ett guut'etsok'one.

*P'awlos Rom Maants Amoosh B́ Gawutsok'o*

<sup>22</sup> Manshowere itmaants twarawok'o ayoto taan baziyeere. <sup>23</sup> Andomó han gúúratsi fa'a datsuwotsatse t finit beeyokuwots bo beetsotse, hank'o ay dúrosh itn s'ilosh een tewuno tdetstotse <sup>24</sup> Ispen maants t amor man weeron itn s'ilosh gawure. Muk' aawosh itnton gene'útsat tteshiyakon twerindo ttuwosh taan falit tep'o it k'alituwok'o jangere. <sup>25</sup> Andomó Ik' jirwots tep'et gizo deshde'er Iyerusalem maants ametuwe. <sup>26</sup> Hanuwere Mek'odoniyonat Ak'yiyi datsatse fa'a Ik' jirwots Iyerusalemn beyiru tugúretsuwotssh boon tep'et gizo woshosh boshunon bogawutsot-sne. <sup>27</sup> Tep'anowere bo shunon imo boosh geyik b́wottsotsne, Ik' ash woterawots ayhudyotsnton shayiri deero kayosh b́wotiyal boowere bomeets deeron ayhudyotsi tep'o boosh geyife. <sup>28</sup> Eshe ko'iyets gizan Iyerusalem maants de'am boosh t imiyakon it weeron waar Ispen maants t ameti. <sup>29</sup> Itok twoor Krstos deero s'eenon itsh de'er tweetuwok'o danfee.

<sup>30</sup> Tieshuwotso! t jangosh Ik'o maants k'onon tmaak'oriruwo taash itdabish nodoonz Iyesus Krstosnat S'ayin shayiri shunon iti k'oniruwe.

<sup>31</sup> Ik'o taash it k'onituwere Yihud datsatsi fa'a amanerawu ashuwots kishotse farr Iyere-salemitse t detsts finonuwere Ik'i jirwotsoke dek'eyo bdaatsituwok'owe. <sup>32</sup> Han bwotiyakon Ik'o bietal geneúwon itok waarr itoke kashdek'o shunfee. <sup>33</sup> Jeeniko Izar Izewer it únetsnton wotowe! Amen.

## 16

### *Jamo*

<sup>1</sup> Feben Knkriy kitotse Ik' moowosh finiru nomish amanetsu b wottsok'o it dano geefe. <sup>2</sup> Bi taanat k'osh ay ashuwotsi b tep'iruwotse amants ibuwotsi ibiyo boosh b wotituwok'o doonzo shútson de'er bish geyit keewo jamon bin it tep'etuwok'o oona itsh etiruwe.

<sup>3</sup> Iyesus Krstos fino finiruwotsnton ik wottsuwots P'rsk'lnat Ak'ilnsh jamo keewwere, <sup>4</sup> boowere t shegro k'iroshoru dab k'andek'kne boteshi, hann boon jam aawosh úditwe, t s'uzi b woterawo Ik' ashwoteraw krstani woto maants aants Ik' moowwotsworu it údirune. <sup>5</sup> Bo moots Ik' k'onosh kakuwets amantsuwotssh jamo t'intsuwere.

Isiyi dats kayatse shini Krstosn amantsonat tshuntso Ep'enet'ossh jamo keewwere. <sup>6</sup> Itsh ayidek'at maawutsu Mariyamsh jamo t'intsuwere. <sup>7</sup> Taanton tipeyat teshts woshetswotsitserere daneets teshts ayhudiyyots jaagúwots Andronik'osnat Yuniyassh\* jamo

---

**16:3** 16:3 Wosh. 18:2 \* **16:7** 16:7 Yuniyassh: Ik ik branon guut'etswotsitse, «Yuliya» etee boetiri.

t'intsuwere, boowere taayere shine Krstosi bo amani.

<sup>8</sup> Doonzon tshúntso Amp'ilyat'ossh jamo t'intsuwere, <sup>9</sup> Krstos finon noonton ik wottso Úrbanosnat tshúntso Ist'akussh jamo t'intsuwere. <sup>10</sup> Krstosk b wottstotse fadeyat bíere bísh gawetso Ap'elishsh jamo t'intsuwere, Arst'obulos maa ash wottsuwotssh jamo t'intsuwere. <sup>11</sup> Ayhudyotse t jago Herodiyonsh jamo t'intsuwere, Narsises maa ashuwotsitse Doonzon amantsuwotssh jamo t'intsuwere.

<sup>12</sup> Doonzosh finon ayidek't maawirwotssh Trufaynnat Trufolsh jamo t'intsuwere. Doonzo finon ayidek'at mááwtsunat Krstosn ayidek'at tshunts Persishsh jamo t'intsuwere. <sup>13</sup> Doonzosh finon ayidek't danetso Rufossh jamo t'intsuwere, taan b naayikok'o shunfu b indshowre jamo t'intsuwere. <sup>14</sup> Asnkritosnat Flegonsh, Hermesmsh, Patrobasmsh, Hermasmsh, bonton fa'a eshúwotssh jamo t'intsuwere. <sup>15</sup> Filologossh, Yulyash, Neryanat b mishsh jamo t'intsuwere, hank'o Olumpasnat binton fa'a amantsuwots jamwotssh jamo t'intsuwere. <sup>16</sup> S'ayin jobon it atsatseyo jobeyar jamo aatewere. Krstosk wotts Ik' maa jamwots jamo itsh t'intsirune.

### *S'uwaaitsi izo*

<sup>17</sup> Ti eshuwotso! it dek'ts dan man k'efituwotsi wotat it dagotse k'aleyon gond bek'o dowet ashuwotsatse it atso korde'ere, boatsere wokoore! <sup>18</sup> Hank'o ashuwots botookosha bako

Krstosshaliye bo finiri. Bonono shaawshdek' dáshon garaamiwots nibo boant'elciri.

<sup>19</sup> Doo shishi aap'osh aleets ash it wottso ash jamokere b̄ danetsotse geneúk t wotwotiyaloru, sheeng keewosh dantswotsi, gond keewoshomó maac' kúp'uwotsi it wotitwok'o geefe. <sup>20</sup> Jeeniko Izar Izewer káári Shed'ano it tufi shirots tiit-setwe.

No Doonz Iyesus Krstos s'aato itnton wotowe.

<sup>21</sup> T finonton ik wottso T'imotiwos jamo itsh t'intsiruwe, eshe ayhudyotse t jag wotts Luk'iyosnat Iyason Sosip'at'roswere jamo t'intsirune.

<sup>22</sup> Woshhan guut'tso taawe T'ert'iyos Doonzon jamo t'intsituwe.

<sup>23</sup> Taanat hanokere fa'a jamo Ik' moowwotsi Ibiiruwo Gayiyos jamo t'intsiruwe, kitutsi gizo detsiruwo Erast'os, no eshú K'a'rt'os jamo itsh t'intsiruwe. <sup>24</sup> †

### *Údi k'ono*

<sup>25</sup> Taa tdaniru doo shishi keewan Iyesus Krstos jangosh beshiyeyiru woshonat yootstson aashat teshtso, andomó be'ets ari ááshts keewon Ik'onwere it imnetiyats it ned'ituwok'o iti woshosh falituwe. <sup>26</sup> Andomó arikan be'ere, dúre dúrts Ik'o tzaziyon jamwots amanar bo aletwok'o Nebiywots mas'aafi weeron ash jamwots bo danetuwok'o k'alere.

<sup>27</sup> B s'uzn dani teleefo detsts Ik'o Izar Izewersh, Iyesus Krstosn dúre dúron údo wotowe! Amen.

---

**16:21** 16:21 Wosh. 16:1 **16:23** 16:23 Wosh. 19:29; 1 K'or. 1:14; 2 T'im. 4:20 † **16:24** 16:24 Hiye awdl taawan yoots guut'ets S'ayin mas'afwotsitse aali.

**Handr Taara**  
**The New Testament in the Borna Language of**  
**Ethiopia (Handr Taara)**

copyright © 2018 The Word for the World International

Language: Borni (Borna)

Contributor: The Word for the World Southern Africa

**Handr Taara**

The New Testament in Borna in Latin version

The Word for the World

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

---

PDF generated using Haiola and XeLaTeX on 21 Feb 2024 from source files dated 8 Apr 2023

cb58eacd-0521-532d-8a14-a3dd0daa6412